

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

06 Mars 2020
11 Rajab 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Bane Attributs d'Allah (Pt.3)

Par la grâce d'Allah mo pé continue mo 3^{ème} partie Khutba Jummah lors bane attributs d'Allah et c'est zis Allah (swt) ki capave donne moi sa *Tawfiq* et sa connaissance là pour élabore sa sujet là en profondeur. Sans So l'aide et So grâce divine mo bien-bien faible pou cause lors ene sujet si important coumsa et li important dans la vie de tous bane croyants pou conne Allah (swt) So bane attributs et nous bizin faire nous ene devoir (ene MUST) ki nous lire So bane attributs tous les jours. *Insha-Allah*.

Mo continuer sa sujet kot dimoune cause menti pou gagne éloges, pou accompli so gourmandise pou gagne l'honneur, grandeur, dibiens ki pas pou li. Li pas fine reinté, travail dur pou gagne sa de façon honnête, mais li faire malhonnête, cause menti pou coquin dibiens so camarade ou so frère ou sœur. Li gourmand, li content ki zis li tout seul gagner et li embête so bane frères ou sœurs, faire signe bane documents pou accapare zot dibiens et après li vire so gros le dos avec sa bane là et pousse zot et li jouir zot di biens.

Si ou guette l'exemple ki Quran pé donner, nous trouver ki ena bane dimounes cause menti, flatter pou gagne bane bel-bel éloge à cause gourmandise et sa ou trouve sa dans la religion aussi. Ena pou gagne l'honneur, grandeur dans la société, li prend responsable soi-disant li pou occupe tel-tel zaffaires (par exemple, couma manger et boire, la tente etc.). Tel jour le matin tel repas, l'heure di thé tel snack et tel boisson, l'heure diner tel repas et so la boisson. Si sa ene programme 3 jours, li même li pou faire tous sa là et lors là li dire mo pou sponsor tel repas ou tel zaffaires. Kan dire li concernant bane dépenses combien sa pou coûter, li dire péna problème, là-même ki li mette ou et la société [Jamaat] en générale dans problème !

Kan tous fine fini, li vini avec ene longue la liste et présente devant le *Managing Committee* et kot sa aussi concerne la société ki pé faire sacrifice. Alors, ou gagne choc ! Là-dans li fine prend so la peine, so l'essence, tous mouvements ki li fine faire et kan ou guetter, jamais ti ena sponsor de n'importe ki zaffaire. Li fine fausse tous bane prix, jusqu'à finalement, li fine tape plein et bane responsables ki jamais zot lizié pou ouvert lors là, zot fine croire. Et lors là lors micro bel éloge pé faire pou li, lors sa bane travail ki li fine faire là et lors soi-disant fine sponsor tel ou tel zaffaires ou sois ki sa dimoune là fine faire bane bel sacrifices. Tous sa là, c'est bane folie grandeur, bane fausse éloges pou quelques jours lors sa la terre là.

Et bane dimounes pou donne sa kalité dimoune ki embête zot là bel respect, pou félicite li et dans so le cœur li dire : « *3 jours ki soi-disant travail mo fine faire, mo faire ene bel profit !* » *Haram* sa ! C'est ene zaffaire bien-bien grave dans lizié d'Allah. Le jour ki Allah pou rasse tous sa là avec ou, ou pou tombe dans déshonneur, la santé ou pas pou ena, sa bane l'argent mal gagner là, ou pou alle diarrhée avec sa. Ou perdi tous céki ou ena, bane kitchoses ki ou ti posséder aussi, sa aussi ou perdi et perdi bêtement. Pou dimounes, ou capave fine alle faire ene la perte bêtement, mais plutôt Allah (swt) fine amène ou vers ou destruction. Kan Allah (swt) attraper, péna sapper are Li. Li donne ou le temps pou ou repentir, mais ou pé continuer dans ou gourmandise et cause menti. Ou pas pou sapé avec sa. Dans mo la vie mo fine trouve beaucoup sa bane kalité dimounes là, ki quantité zot ti été avec zot l'arrogance, vantardise, sauter lors zot richesses (et surtout bane l'argent mal-gagner) ; en dernier lieu zot vine plisse ki ene mendiant. Ene mendiant même ena valeur devant li, et li alle tombe dans ene tel situation kot personne même pas guette li.

Donc, si ou réfléchi lors le mensonge et applique li lors Surah Al-Fatiha, bé ou pou trouver ki chaque attribut de Surah Al-Fatiha pé témoigne la vérité d'Allah, pé qualifié Allah comme *Al-Haqq*. Sa c'est parski sa attribut là montrer ki Li [Allah] péna aucaine nécessité de mensonge. Ene l'autre raison derrière le mensonge c'est pou cachiette ou manque de connaissance. Beaucoup bane dimounes zot donne bane réponse vite-vite de sorte ki bane dimounes conner ki zot pas bane ignorants, de peur attention ki dimoune alle conner ki zot pas conne nannié. Alors vite, vite zot dire n'importe quoi. Ena bane dimounes pas content ki découvert zot bane manque de connaissance ; donc zot cause menti. Et la majorité de sa bane mensonges là zot caché de sa bane même dimounes ki pé cause menti là. Zot pas pé cause menti intentionnellement mais de par zot façon de faire comme-ci c'est ene vérité et à cause de sa parfois ena bane grand désordres.

Hazrat Mousleh Maoud (ra) ti bien méticuleux lors sa point là. Si ene dimoune pé dire ki là-bas ti arrive tel zaffaire, toute suite li pou demander couma ou conne sa? Si ou pas conner et ou pas fine trouver, bé ki faire ou pé dire ene zaffaire à peu près ? Dans certaines situations sa bane estimation là aussi c'est ene mensonge. Quran fine donne sa l'exemple là et fine dire ki la majorité de bane dimounes de sa la terre là zot ena bane tel l'habitude ki si ou suivre zot ou pou alle égarer. Ici li pas ene question de *Kafir* et *Momin*. Mais fine dire la majorité de bane dimounes, et sa c'est ene zaffaire bien vrai ki la majorité de bane dimounes si zot pas conne ene zaffaire, zot dire li à peu près, zot faire ene estimation.

Donc, adressant Hazrat Muhammad (saws), Allah (swt) dire ki : Toi to ene habituer de dire bane vérité tel ki to trouver, et to accepter bane vérité ki to trouver. Mais bane dimounes lors laquelle Nous pé dire toi, la majorité d'entre zot c'est bane dimounes ki présente bane zaffaires d'après zot estimation, d'après zot penser. Zot péna ene connaissance exacte, zot penser seulement. Allah (swt) dire : Si to suivre zot définitivement to pou alle égarer. Zamais zot pou gagne guide. Zot cause menti à cause zot manque de connaissance.

Mais pou Allah (swt) fine dire ki Li conne tout, Li *Aleem*. Et bane attributs ki mentionner dans Surah Al-Fatiha demande ene connaissance complet. Dans Surah Al-Fatiha ou guette et analyse le *Rahman*, ki ene attribut d'Allah. Bé *Rahman* li ene attribut de base pour la création et pas capave ena la création sans connaissances. C'est le Créateur ki ena plisse connaissances. Et si le Maître, Li

pure de tout bane mal, bé c'est à cause de So connaissances ki Li pure de tout sa bane mal là.

Donc, le sujet *Hamd* kan joine avec *Rabboubiyyat* et le sujet de *Rahman* aussi rentre là-dans, bé à ce moment là li ene preuve véritable ki ene tel Être ena tout connaissance ; ene connaissance parfait. Parski Celui ki fine crée, c'est Li même ki conner. Ene dimoune ki péna connaissance li pas pou conner même ki ene tel zaffaire été. Bane dimounes ki ena la connaissance de tel-tel choses, zot conner ki faire fine servi bane tel-tel zaffaires etc. Zot conne tous les détails de sa. Donc, manque de connaissance aussi parfois faire bane dimounes cause menti, parfois délibérément et parfois sans l'intention. Mais Allah, ki le Surah Al-Fatiha pé présenter, c'est ene Allah ki ena tout connaissance. Péna personne ki ena plisse connaissance ki Li. Ensuite bane dimounes ki péna le pouvoir de crée, sa faire zot cause menti.

En fait sa ena connexion avec éloge et gourmandise. Bane dimounes ki pas capave arrange ene vrai chose zot fabrique ene fausse kitchose. En fait autant bane imitation ki ou gagner dans le marché, c'est sa même sujet là, et bane dimounes ki content faire bane show ou sois hypnotise bane dimoune et faire magique etc., tout sa ena connexion avec sa sujet là. Zot pas capave crée de vrai choses. Alors zot servi la déception. Zot envie crée, et alors zot cause menti pou ki zot gagne ene partie de sa attribut de crée là. Si zot pas capave crée bane vrai choses, zot crée bane fausse choses. Quran fine éclaire sa sujet là en donnant l'exemple de Hazrat Moussa (as) et bane sorciers. Pas fine dire ki le bâton de Hazrat Moussa (as) fine mange tous bane serpents là. Fine dire ki pas ti ena même serpents. Kot zot ti ena pouvoir pou crée bane serpents là ? Zot ti seulement hypnotise lizié de bane dimounes, fine faire magique are zot !

Guette ki kalité éloquences Quran ena. Li dire ki bâton là fine mange bane mensonges là. C'est-à-dire fine établi la vérité et fine montrer bane la corde là comme bane la corde même. Donc, c'est pas serpent mais c'est le mensonge ki disparaître nette.

Ensuite c'est l'injustice ki ene moyen ki faire bane dimounes cause menti. En fait c'est ene manque de [attribut] *Malik*. Ene dimoune ki pas maître et ki pas maître de tout bane choses et li trouve ene lotte dimoune maître d'ene tel zaffaire, bé li pou désire approprier sa zaffaire là aussi. En fait sa c'est la gourmandise ki déjà

avant mo fine mentionner. Mais sa sujet là ena ene lien avec royaume aussi, avec propriété aussi. C'est bane dimounes ki pas lé roi mais ki cause menti pour approprier di biens de bane les autres dimounes. Mais celui ki vraiment le Roi, bé ki utilité ena pou Li cause menti? Et parfois arriver, sa bane ti erreurs là, pli tipti ki sa encore, zot ena l'effet lors l'intention et parfois li affecter même bane grand dimounes zot l'intentions.

À cause faute de temps, fine arrive l'heure pour mo arrêter. Mo faire *duahs* avec Allah (swt) ki Li donne moi sa *Tawfiq* là pou mo contigne le 4^{ème} partie de sa Khutba Jummah là, la semaine prochaine lors sa même sujet là *Insha-Allah*. Li ene sujet tellement vaste, et bizin alle au profond pou comprend so l'importance. Mo faire beaucoup *duahs* ki Allah (swt) faire zot comprend bien l'importance de So bane attributs, *Insha-Allah*.

Allah en vérité bien bon envers nous. Li accorde nous tout saki nous bizin lors sa la terre là, sans même ki nous bizin demande li. Li *Rahman*, Li *Rahim*. Li fine donne nous bane parents et fine faire nous grandi en tant que musulmans. Alors eski nous pas bizin remercier Li ? Li même Li possède tout connaissance, mais Li ene Bondié ki content partager aussi. Li pas garde tout connaissances pour Li. Li fine donne nous ene minimum de So connaissances afin ki nous comprend So grandeur et ki nous adore Li et ki nous faire bons lors la terre.

Li fine donne nous la connaissance ki vine depuis kot Li à travers So bane prophètes, et surtout nous Aka Hazrat Muhammad (saws) en forme du Quran Shareef. Anou faire sa *duah* là afin ki nous reste toujours pieux dans le chemin d'Allah, et ki Allah éloigne de nous toutes sortes de mensonges et péchés et ki nous reste toujours gentils et faire *duahs* pour nous bane parents [pour bane ki zot parents encore vivants, et kan à bane ki zot bane parents fine décédé, faire *duahs* pour zot et donne *Sadqua* en zot noms afin ki sa bane bons actions là continuer accumulé lors zot noms même dans *Aakhérat*]. Alors nous faire sa *duah* là : **Rabbi 'awzi'-niii an 'ashkura ni'-matakallatii an-'amta 'alayya wa 'alaa waalidayya wa 'an 'a'-mala saalihan-tarzaahu wa aslih lii fii zurriyyatii. 'Innii tubtu 'ilay-ka wa 'innii minal-Muslimeen.**

« O mo Maître, accorde moi ki mo remercier Toi pou faveurs ki To fine faire moi et mo parents, et ki mo faire ene bien ki pou faire Toi plaisir. Donne moi de meilleurs zenfants. Mo tourne vers Toi et mo soumette à Toi. » Ameen, Summa Ameen, Ya Rabboul Aalameen.